



ISLAMSKA ZAJEDNICA BOŠNJAKA U ŠVEDSKOJ  
**DŽEMAT HALMSTAD**  
STATUT DŽEMATA

Na osnovu Pravilnika o organizaciji Islamske zajednice u BiH u dijaspori, član 22. i Statuta Islamske zajednice Bošnjaka u Švedskoj, član 9. Skupština džemata Halmstad je na svojoj redovnoj sjednici održanoj dana 2024-03-02 usvojila ovaj Statut džemata Halmstad

## OPĆE ODREDBE

### Član 1.

Puni naziv džemata je Islamska zajednica Bošnjaka u Švedskoj – Džemat Halmstad.

### Član 2.

Sjedište džemata je u Halmstadu.

### Član 3.

Džemat ima svojstvo pravnog lica.

### Član 4.

Džemat je sastavni dio Islamske zajednice Bošnjaka u Švedskoj (u daljem tekstu IZBUŠ), a time i dio Islamske zajednice u Bosni i Hercegovini (u daljem tekstu IZ u BiH).

### Član 5.

Svrha džemata je da, u duhu islamskog učenja, čuva i razvija vjerski život među muslimanima na svom području i podstiče ih na vjerske i humanitarne akcije.

Cilj džemata je:

- očuvanje i proklamovanje svih vrijednosti islama
- islamski odgoj i obrazovanje svih pripadnika džemata
- osiguranje svojim pripadnicima uslova za izvršavanje islamskih dužnosti

Svoj cilj džemat postiže:

- organiziranjem vjerske pouke u džematu,
- organiziranjem vjerskih aktivnosti u džematu,
- jačanjem materijalne osnove džemata,
- dosljednim sprovođenjem odluka viših organa Islamske zajednice,
- podsticanjem ženskog aktivizma,
- njegovanjem bosanskog jezika u skladu sa Deklaracijom o bosanskom jeziku, koju je usvojio Sabor IZ u BiH,
- očuvanjem i proklamovanjem svih vrijednosti islama,
- propagiranjem trezvenosti i zahtijevanjem da njegovi članovi budu potpuno trezveni u skladu sa Kur'anom i Sunnetom i
- svakom drugom korisnom djelatnošću usmjerenom na vjersko, kulturno, obrazovno, socijalno i ekonomsko uzdizanje muslimana na svom području.

#### Član 6.

Džemat svoje djelovanje temelji na Kur'an-i-kerimu i sunnetu Muhammeda, alejhi-s-selam, islamskoj tradiciji Bošnjaka i zahtjevima vremena, te Ustavu IZ u BiH, zakonima Švedske, Statom IZBUŠ-a i ovim statutom.

U tumačenju vjere i izvršavanju ibadetskih islamskih dužnosti džemat primjenjuje maturidijski akaid i hanefijski mezheb, stara se za ispravno razumijevanje i življenje islama, štiti vjerska prava muslimana, te osigurava uvjete za prenošenje emaneta s ciljem da svi pripadnici džemata žive u skladu s islamskim normama, a što se ostvaruje promicanjem dobra i odvrćanjem od zla.

#### Član 7.

Status imama, uvjeti za prijem u službu, prestanak službe, način rada, prava i obaveze te druga pitanja od značaja za rad imama uređuju se posebnim aktom koji donosi Skupština IZBUŠ-a, a koji mora biti usklađen s Pravilnikom o imamima Islamske zajednice i na koji saglasnost daje Rijaset.

#### Član 8.

Službeni jezik u džematu je bosanski jezik, s tim da džemat dopušta da se njegovi vjerski autoriteti i predstavnici obraćaju i na drugim jezicima.

### **FINANSIRANJE**

#### Član 9.

Imovinu džemata čine vakufska dobra, imovinska prava, novčana sredstva i druga imovina. Imovina džemata služi za djelatnost kojima se postiže cilj Islamske zajednice i ne može se koristiti u druge svrhe.

Imovina džemata ima status vakufske imovine na koju se odnose pravila i propisi Islamske zajednice o vakufskoj imovini.

Džemat se finansira:

- članarinom na osnovu Pravilnika o jedinstvenoj članarini i vjerskim uslugama IZBUŠ-a,
- procentom prikupljenog zekata i sadekatu-l-fitra,
- procentom prihoda prodaje edicija,
- dobrovoljnim novčanim i drugim priložima svojih članova, te ostalih zajednica, društava, ustanova i sl. i
- drugim sredstvima koje džemat realizira svojim radom.

#### Član 10.

Ovlašteni potpisnici dokumenata u ime džemata su pojedinačno predsjednik, sekretar i blagajnik.

## ČLANSTVO

### Član 11.

Članom džemata može postati svaki građanin koji prihvati ovaj statut i na osnovu Pravilnika o jedinstvenoj članarini i vjerskim uslugama potpiše pristupnicu za plaćanje članarine putem Porezne uprave.

### Član 12.

Prava člana džemata su:

- da sudjeluje u radu džemata,
- da bira i bude biran u organe džemata,
- da bude informiran o aktivnostima u džematu,
- da daje prijedloge za unaprjeđenje rada džemata,
- da slobodno ispoljava pripadnost islamu i ispunjava islamske obaveze,
- da se islamski odgoja i obrazuje,
- da koristi džematske prostorije za izvršavanje vjerskih obreda shodno važećim pravilima i
- da se obraća organima džemata radi zaštite svojih ličnih vjerskih prava
- da se pismenim putem može obratiti Skupštini džemata sa svojim prijedlozima, najkasnije do 31. oktobra tekuće godine

### Član 13.

Dužnosti člana džemata su:

- da poznaje i primjenjuje propise Islamske zajednice i da štiti islamske vrijednosti,
- da čuva ugled Islamske zajednice i
- da plaća članarinu.

### Član 14.

Članom džemata se prestaje biti smrću, na vlastiti pismeni zahtjev sekretarijatu IZBUŠ-a ili isključenjem zbog grubog kršenja odredaba ovog statuta. Odluku o isključenju donosi skupština IZBUŠ-a na prijedlog izvršnog odbora IZBUŠ-a ili skupštine džemata.

## ORGANIZACIJA DŽEMATA

### Član 15.

Organi džemata su:

- skupština,
- džematski odbor,
- reviziona komisija,
- izborna komisija i
- statutarna komisija.

## Član 16.

Skupština je najviši organ džemata, a sačinjavaju je svi punoljetni članovi džemata, tj. oni koji su napunili 18 godina. Skupštinu džemata saziva džematski odbor, a vodi je radno predsjedništvo koje se bira na početku zasjedanja.

Skupština može zasjedati i punopravno odlučivati bez obzira na broj prisutnih, pod uvjetom da je poziv za skupštinu objavljen i upućen članovima džemata najmanje 2 sedmice prije održavanja skupštine.

Skupština donosi odluke većinom glasova prisutnih članova, izuzev odlučivanja o statutu džemata i donošenja odluke o ukidanju džemata, koje se donose dvotrećinskom većinom prisutnih članova.

Skupština ne može donositi odluke o nečemu što nije najavljeno u pozivu za skupštinu.

Redovna skupština održava se jednom godišnje i to najkasnije do kraja mjeseca marta.

Vanredna skupština održava se ukoliko to zaključi džematski odbor, IO IZBUŠ-a ili ako to pismenim putem zatraži najmanje 10% članova džemata.

Sazivanje, rad i odlučivanje na sjednicama skupštine odvija se prema poslovniku o radu, kojeg donosi skupština džemata.

Skupština džemata je nadležna da:

- donosi odluke koje se tiču organizacije i aktivnosti džemata i vjerskog života u džematu,
- bira članove organa džemata i zastupnike džemata u skupštinu IZBUŠ-a,
- pokreće inicijativu za izgradnju ili kupovinu objekata džemata,
- daje smjernice džematskom odboru za preduzimanje mjera s ciljem poboljšanja vjerskog života u džematu,
- razmatra i usvaja izvještaje džematskog odbora o njegovom radu i ocjenjuje njegov rad,
- usvaja godišnji plan rada i budžet džemata i
- obavlja i druge poslove iz svoje nadležnosti.

## Član 17.

Džematski odbor upravlja džematom u mandatnom periodu, a saziva se, radi i odlučuje po vlastitom poslovniku o radu, koji mora biti u skladu sa statutom džemata.

Džematski odbor ima pet članova ukoliko džemat ima ispod 200 domaćinstava, a sedam kad ima 200 i više domaćinstava. Pod domaćinstvom iz prethodnog stava podrazumijevaju se svi članovi koji žive na jednoj adresi. Prilikom izbora džematskog odbora vodi se računa o participiranju ženske populacije i mladih.

Za predsjednika džemata ne može se birati imam džemata, kao ni zaposlene osobe u džematu. Predsjednik, sekretar i blagajnik džematskog odbora biraju se iz reda članova džematskog odbora od strane džematskog odbora na konstituirajućoj sjednici.

Članovi Džematskog odbora imaju jednakopravan glas. Sve odluke donose se većinom od ukupnog broja članova Džematskog odbora.

Predsjednik džematskog odbora predstavlja džemat u administrativnim, finansijskim i imovinsko-pravnim poslovima. Imam džemata je član džematskog odbora po položaju i predstavlja džemat u stvarima vjere. Ukoliko u džematu ima više imama, dekretom će se odrediti ko je prvi imam, a time i član džematskog odbora po funkciji.

Prilikom izbora džematskog odbora biraju se i dva zamjenika koji se redovno pozivaju na sjednice odbora i dobivaju pravo glasa ako je neko od članova džematskog odbora spriječen da prisustvuje dotičnoj sjednici. Na određene sjednice po potrebi se mogu pozvati i drugi članovi džemata ili neko drugi, čija stručnost i iskustvo može pomoći u radu.

Džematski odbor je nadležan da:

- osigura uvjete za vjerski život u džematu,
- provodi odluke skupštine džemata i viših organa Islamske zajednice,
- vodi brigu o imovini džemata,
- u koordinaciji sa glavnim imamom učestvuje u odabiru imama u džematu,
- po zaključku skupštine džemata, daje inicijativu za pribavljanje potrebnih odobrenja i investiciono-tehničke dokumentacije za izgradnju, rekonstrukciju i popravku vjerskih objekata u džematu,
- skupštini džemata podnosi izvještaj o radu i izvještaj o finansijskom poslovanju
- skupštini džemata dostavlja na vrijeme pismenim putem prispjele prijedloge članova džemata
- skupštini džemata predlaže plan rada i budžet,
- dostavlja Izvršnom odboru IZBUŠ-a plan rada, budžet, izvještaj o radu i izvještaj o finansijskom poslovanju,
- kao formalni poslodavac odlučuje o zasnivanju radnog odnosa i povremenog angažiranja radnika, zasnivanju i prestanku radnog odnosa i nadoknadama i
- obavlja i druge poslove iz svoje nadležnosti

Ukoliko izvršni odbor IZBUŠ-a utvrdi da džematski odbor ne vrši poslove za koje je nadležan na odgovarajući način, donijet će odluku o raspuštanju džematskog odbora i naložiti Skupštini džemata da izabere novi džematski odbor u roku od 30 dana.

Do izbora novog džematskog odbora funkciju džematskog odbora vršit će tročlano povjereništvo koje imenuje Izvršni odbor IZBUŠ-a.

#### Član 18.

Revizionarna komisija se sastoji od tri člana i ima zadatak da vrši kontrolu cjelokupnog funkcioniranja džemata, te o tome podnosi izvještaj skupštini džemata.

Članovi Revizionarne komisije ne mogu biti članovi nekog drugog organa džemata, izuzev skupštine džemata.

#### Član 19.

Izborna komisija se sastoji od tri člana i ima zadatak da, na temelju osnovnih izbornih pravila IZBUŠ-a i/ili IZ u BiH, sačini listu kandidata za sve organe džemata.

Statutarna komisija IZBUŠ-a je ujedno i statutarna komisija džemata.

#### Član 20.

Svi organi džemata biraju se na mandat od četiri godine.

#### Član 21.

Svi organi džemata dužni su imati vlastiti poslovnik o radu. Sve što nije precizirano ovim statutom, organi džemata reguliraju poslovníkom o radu.

#### Član 22.

U džematu po potrebi mogu biti formirane i druge komisije.

#### Član 23.

U organe džemata može biti biran svaki njegov član sa boravkom u Švedskoj, koji je napunio 18 godina, koji je član IZBUŠ-a najmanje tri godine prije izbora, da govori bosanski i švedski jezik i koji izvršava svoje obaveze u džematu.

#### Član 24.

Nosilac dužnosti u organima džemata može i prije isteka mandata biti razriješen dužnosti ukoliko je:

- njegovo ponašanje i rad u suprotnosti sa islamskim normama,
- njegov rad suprotan propisima i odlukama organa Islamske zajednice i džemata,
- nesposoban ili nemaran u izvršavanju obaveza u organu u koji je izabran,
- zloupotrijebio svoj položaj i
- podnio ostavku.

Odluku o razrješenju dužnosti donosi džematski odbor, s tim da se ta odluka mora potvrditi na prvoj narednoj skupštini džemata.

### **ZAVRŠNE ODREDBE**

#### Član 25.

Džemat primjenjuje i koristi prema važećim pravilima vizuelni identitet (logo i znak Islamske zajednice) koji je usvojen od strane Sabora IZ u BIH.

#### Član 26.

Džemat ima pečat okruglog oblika sa znakom Islamske zajednice na kojem je ispisan puni naziv džemata na bosanskom i švedskom jeziku.

#### Član 27.

U slučaju da džemat prestane s radom, sva novčana sredstva koja se u tom trenutku zateknu u kasi džemata, te sva pokretna i nepokretna imovina, kao i sve obaveze džemata prelaze na IZBUŠ.

Odluku o prestanku rada džemata donosi Rijaset IZ u BiH, na prijedlog IO IZBUŠ-a i oduke skupštine džemata.

Član 28.

Autentično tumačenje ovog statuta daje Skupština džemata, a između dviju Skupštine tumačenje daje Statutarna komisija IZBUŠ-a.

Član 29.

Ovaj statut usvojen je na skupštini džemata, održanoj dana 2024-03-02 i stupa na snagu danom donošenja. Stupanjem na snagu ovog statuta prestaje važenje dosadašnjeg statuta i drugih normativnih akata koja moraju biti usaglašena sa ovim statutom.

Predsjedavajući skupštine:

  
Almedin Spahić